



UNIVERSITÄTS-
BIBLIOTHEK
PADERBORN

Universitätsbibliothek Paderborn

**D. Petri Chrysologi Archiepiscopi Ravennatis, viri
eruditissimi atque sanctissimi, Sermones In Evangelia De
Dominicis & festis aliquot solemnioribus totius anni,
insignes & peruetusti**

Petrus <Chrysologus>

Lvgdvni, 1623

De natiuitate Christi, Sermo CXLIX. Quem quidam D. Seueriani Episcopi
putant, sed falso.

[urn:nbn:de:hbz:466:1-50232](https://nbn-resolving.org/urn:nbn:de:hbz:466:1-50232)

stus, vt nascendo corruptam redintegret naturam: infantiam suscepit ille, patitur nutrimenta, percurrit etates, vt vnā perfectam, manentem, quam ipse fecerat, instauraret aetatem: portat hominem, ne iam cadere homo possit: quem terrenum fecerat, fecit esse cœlestem: animatum humano Spiritu, Spiritum viuificat in diuinum, & sic eum totum tollit in Deū, vt in eo quod peccati, quod mortis, quod laboris, quod doloris, quod terræ est, nil relinquat: præstante domino nostro Iesu Christo, qui cum patre viuuit, & regnat in vnitāte Spiritus sancti Deus, nunc, & semper, & per immortalia sæcula sæculorum, Amen.

De natiuitate Christi, Sermo CXLIX.

Quem quidam D. Seueriani Episcopi putant, sed falso.

IN aduentu domini & saluatoris nostri, atque in præsentia eius corporali Angeli ducentes choros caelestes euangelizabant pastoribus, dicentes: *Anuncio vobis gaudium magnum, quod erit omni populo.* Ab ipsis ergo sanctis Angelis etiam nos mutuati vocem, annunciamus vobis gaudium magnum. Hodie enim Ecclesia in pace est, & hæretici in ira: hodie Ecclesie nauis in portu est, & hæreticorum furor iacetatur in fluctibus: hodie fratres, pastores Ecclesie in securitate, & hæretici in perturbatione sunt: hodie oues domini in tuto, & lupi insaniunt: hodie vinea domini in abundantia, & operarij iniquitatis in indigentia: hodie populus Christi charissimi, exaltatus est, & inimici veritatis humiliati sunt: hodie dilectissimi Christus in lætitia, & diabolus in luctu: hodie Angeli in exultatione, & damones in confusione. Et quid plura dicere? Hodie Christus qui

qui est Rex pacis, cum sua pace procedens fugauit omne dissidium, dissensiones depulit, discordiam perturbauit, & sicut cœlum splendor Solis, ita Ecclesiam fulgore pacis illuminat. *Quia natus est vobis hodie, ait, saluator mundi.* O quam desiderabile nomen pacis: quam religionis Christianæ stabile fundamentum, & altaris dominici cœlestis ornatus. Et quid dignum possumus de pace proloqui? Pax nomen est ipsius Christi, sicut & Apostolus dicit: Quia Christus est pax nostra, qui fecit vtraque vnum: quæ non sententiis, neque fide, sed inuidia diaboli dissidebant. Verum sicut procedente Rege, & plateæ mûdantur: & omnis ciuitas diuersis floribus & ornatibus coronatur, vt nihil sit, quod minus dignum vultui regis appareat: ita & nunc procedente Christo Rege pacis, omne quod triste est, auferatur à medio: & illucescente veritate fugetur mendacium, fugiat discordia, resplendeat cœcordia. Et sicut frequenter fieri videmus, vbi regnum, vel fratrum tabulæ depinguntur, vt inter vtrosque vnanimitatis declarantur insignia, artifex pictor fœmineo habitu post tergum vtriusque concordiam statuit, quæ brachiis suis vtrumque complectens indicet: quod hi qui videntur corporibus separati, sententiis & voluntate conueniant, ita nunc pax domini media assistens, & vtrumque nostrum gremio palpante connectens, discreta corpora in vnum conuenire animum vlnis iungentibus docet, in quo sine dubio completur sermo Propheticus; qui ait: Et erit consilium pacificum inter vtrosque. Et hesternò quidem pater noster communis Euangelico pacis sermone præfatus est, hodie vero nos verba pacis expromimus: ipse nos hesternos resupinis manibus in verbo pacis excepit, & nos hodie dilatato pectore, vniuersisque patentibus

Eph. 2.

Zach. 6.

ad

ad eum cum muneribus pacis occurrimus. Iam bella destructa sunt. Omnia pulchritudo pacis obtinuit, nunc in luctu est diabolus, & in lamentatione omnis demonum turba, nunc in cœlestibus lætitia, & in Angelis exultatio, quibus specialius familiaris est pax: hanc enim etiam cœlestes admirantur virtutes, apud quas fons eius habetur perennis: ex quo etiam terreni guttis quibusdam exinde distillantibus irrorantur. Et ideo etiam si in terris pax laudatur à sanctis, laudis eius splendor redundat in cœlum: laudant etiam cœlestes angeli, & dicunt: *Gloria in altissimis Deo: & in terra pax hominibus bone voluntatis.* Videtis fratres, quomodo cœlestes omnes, terrestres inuicem sibi munera pacis mittunt, cœlestes angeli pacem terris annunciant, sancti in terris Christum, qui est pax nostra, colaudant in cœlestibus positum, & mysticis choris conclamant. *Hosiahanna in excelsis.* Dicamus ergo & nos cum Angelis: *Gloria in altissimis Deo, qui humiliavit diabolum, & exaltauit Christum suum. Gloria in altissimis Deo, qui discordiam fugauit, & pacem statuit.* Videte fratres, vocem Angelicam exultantem. *Gloria in excelsis Deo: & in terra pax.* Dico enim vobis artem diaboli, cuius neque vos ignoratis astutias. Vidit satanas firmitatem fidei, stabilitatemque: vidit eam pietate dogmatum septam: vidit eam operum bonorum fructibus abundantem: & ideo pro omnibus ad insaniam venit, & rabie furoris exarsit, ut inscinderet concordiam, ut conuelleret charitatem, ut disrumperet pacem, sed pax semper sit nobiscum.

De fuga Christi in Ægyptum, Sermo CL.

SI conceptum Virginis, Virginis partum sermo nō
 Saperit, sensus non recipit, non capit mēs humana,
 Deum,